

9. august 2013

UKA 2013/30

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumu-una saqqummiuppara:

Peqqissaasut Palliativ-imik nakorsaasinnaanermut ilinniaqqissinnaaneranguniarlugu immikkut aningaasaliisoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Doris Jakobsen, Siumut)

Tunngavilersuut:

2012-imi Inatsisartut ukiakkut ataatsimiinneranni aaliangiiffigisassatut siunnersuut imm. 60 imaattoq saqqummiuppara:

“Kalaallit Nunaanni napparsimasunut katsorsarneqarsinnaanngitsunut paaqutaqarfimmik (hospice) pisariaqartitsisoqarneranik Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut.

Siunnersuut allannguutissamik saqqummiussisoqarneratigut akuersissutigineqarpoq.

Napparsimasunut katsorsarneqarsinnaanngitsunut paaqutaqarfimmik (hospice) pilersitsinissaq anguneqassappat pingaarnerpaat ilagivaat toqujartortunut anniartitsinaveersaarlutik ikiuisinnaasunik suliamillu immikkut ilinniarsimasunik kalaallinik peqqissaasunik naammattunik peqalernissaq.

Palliativ-imik nakorsaaneq tassaavoq kræftimik nappaatip peerneqarsinnaangitsup katsorsarneqarsinnaangitsulluunniit imaluunniit nappaatip anigorneqarsinnaanngitup piginerani anniarunnaarnissaq siunertarlugu nakorsaaneq.

Ullumikkut Danmarkimi peqqissaasut Palliativ-imik nakorsaasinnaasutut Danmarkimi ilinniarsinnaapput.

Isumaqarpunga nunatsinni Palliativ-imik nakorsaasinnaasutut ilinniartitaasinnaanermik periarfissaq Danmarkimi Palliativ videntcenter (PAVI) suleqatigalugu pilersinneqarsinnaasoq.

Peqqissaasutut ilinniarsimasut ilinniakkamik qaavatigut qaffassaqqinniarlutik Namminersorlutik Oqartussanut tapiiffigineqarnissamik qinnuteqarsinnaapput, kisianni qaffassaqqinnissamik qinnuteqaatit suliarineqarneri sivisusinnaasarmata Palliativ-imik nakorsaasinnaanermut ilinniarusulluni immikkut qinnuteqarsinnaanissaq pisariaqartutut isigaara tamaattumillu

isumaqarlunga isumatusaarnerussasoq Palliativ-imik nakorsaannermik ilinniarnissamut immikkut atugassanik aningaasanik illuartitsisoqarnissaa, sinerissami taamatut suliaqarsinnaasut kalaallisut oqaasillit naammattut pigilerniassagutsigit.

Pisortanut aningaasaqarnikkut allaffissornikkullu sunniutissai

Palliativ-imik nakorsaasinnaasutut ilinniartitaasinnaanermik periarfissaq pilersikkumallugu aningaasaliisoqarpat nunatta karsianut tamanna naleqassaaq, peqqissaasutulli ilinniarsimasunut ilinniaqqinnissaannut periarfissiissaaq kingornatigut inuiaqatigiinnut minnerunngitsumillu toqjartortut ilaqutaasalu pitsaasumik sullinneqarnissaannut iluaqutaassalluni.

Allaffissornikkut sunniutissai tassaapput aningaasaliissutit nakkutigineqarneri, qinnuteqartut allaffissornikkut sullinneqarnerat il. il.

Qanorli annertutigisumik aningaasaliinissaq inissilluarneqarsinnaavoq Palliativ Videncenter suleqatigalugu.

Aningaasaliissutit peqqinnissaqarfiup iluani avataaniluunniitt nassaarineqassapput.